



MATU NOKNA

Matu nokna he khasut lawng Baren, Vakawk, Palaa, Selliing on Sellu tila pokna tlo tlo awm.

1. Baren

Baren tah dyk hing kawthee, awmngaih on poi tlok veng zusuk lam on awmthen a bonna. Tede khasut ham tah tawh thii na on ngawn kahna, tola a thong pui . Athe 50%, Atheen ben 50%.

2. Vakawk

Vakawk he Ca acun veng phemul boih a pylh tih thingkaw khuiah bu a tuk. Ava lawng caak a thak pe tih a va adyk ouh atah bungpawng ry la aca on dyk haih. Bongat kaw apok tih a cilcak. Tedawng Chin phyn nokna vakawk tai la awm. Tang tang te he Matu nokna la tai kop ham song nawh. Athee 60% Athenben 40%.

3. Palaa

Palaa tah diklai pum boih lawng khaw seh hawna la awm. Pawngsaa on thlanghing ceem, ngawn kahna ham haw paina la awm. Athee 70% Athenben 30.

4. Selliing

Selliing he selpel poitlok veng Seel kingna tungbek la awm. Seel a awm dawngah selling ka awm ni. Nupa lawng athui tah, "Acyk lumha seel, huthoi hukhyng selling" tila a thui. Seel dykna saiceh thlanmawl tungbeek la ni a awm. Athee 70% Athenben 30%.

5. Seellu

Mara on Zoutung lawng tah azuu phu vangla Marang a peek u. Khumi lawng Mawng, Rawhum a peek u.

- (a) Laimi on Zoumi lawng Panaa
- (b) Meram on Zoutung lawng Marang
- (c) Khumi lawng Mawng on Rawhum asingzo na.

Matu lawng atah poitlok, Zuu lawh vangphu, Raawk daa, lu sawna on zouthee zouthen daamna singzo hawpaaina kok im pawngsaa pakhat la awm. Te dawng nupa lawng "seel thlaang, thlaang hu ah seel bat" tila an na thui u. Matu singzo ka sop kok tawngpa tang la awm. Te dawng seel lu he matu nokna la taai tih tyng sak la awm.

NLD LAWNG KAWL BRAN TAZA A CAWI

Kum 2008, Bran lawng mawtna a lawng im (Constitution) thlakrol (104) asai.

Democracy a lawng 1/ Athaan (11) na, a ka song a colh Democracy a lawngim on ram maawt ham tila a tyng sak. Tede March 9th hin, Meet Commission hui at ka tyk ve tih, Politics (rampai thaina) on bet pha u nawh thlaang ai tila apek bou. Tedawng Democracy a lawng im (Constitution) tah a eek tih bran amah lawng akaan dop.

1. Meet a lawng im 2/ Athaan (90) na, u ca boih lawng meet dyn thai la awm ai tila a tyng sak. Te de March 9th hin Meet ka dyn thai koi tah, Airawl khui ka pha vai nawh thlaang ai tila, a lawng im a sai te a eek tih bran a mah lawng akaan dop.
2. Thawlh Tara cek a lawng im 2/ Athaan (100) na, thlang khat mengteng thil tih mikhai thee zarau pawh on kawnghu thawlh saina thol kop nawh ham tila a tyng sak. Tede Airawl khui ka pha vai thlaang lawng meet dyn thai manawh tila a eek tih bran a mah lawng akaan dop. Tetihla awl tlok hona tah, NLD party on thlang khat a mengteng tih mikhai thee a sai .
3. Baran kah alawng im song nawh saina tah alawng im ka song on phe kop thai ai tila, Daw Suu Kyi kah awl tha, U Yaw Win lawng athui. Te dawng March 25th hin ah, NLD rawihui lawng awlcek (Tuung) bawi hai ah kawl bran taza a cawi.

NLD RAWIHUI KAH AWL TLOKNA

Kum 1990, kawl ramtung Party cuut Meet tykna awm veng, NLD lawng 85% Meet ram a dang tih a taa. Tede bran lawng uk na aa na peek ham atha na. Pabee ah a thai la Meet sangkop ham kam thlah tih, mawtna a lawng im (Constitution) a sai. Kum 2008 May 10th hin ah Meet sangna, ahoi lee tih alawng im a cak sak. Kum 2010 January 4th Independence hin veng thoih nawng tlahi ouh la Meet ng'sang pon ai tila, Senior General. Than Shwe lawng a hoo. Te cakhaw ram thai, on Baran thai pai sak ham koi dawng, Bran on NLD, Tlaang thlaang, hai nawh ka mawk ceem on pilnam lak law ah roproi nawhna awm tih, pekbouna thli awm. Pilnam to khaw, tamna la a pin tih raina apek dawng ram tlo tlo lawng kawl Bran a dook.

Kawlramtung UN laipai Mr. Quantana tah February thla dawngah kawlrham hip ham sawben ka lawng atuih. Yakhengram ahiil dawng tih khaw hu voi (2) ip. Bran on Napeedaw ah humtung u thee bal. Ahih lawng meet tykna a awm thlanah law kop ham ka kam thlahna awm tih meet sang thlan (nawh tah) meet sang cong pilnam thlangpingthli khawpaw on pangna awm thai mai tila amel cong athui. Bran lawng march 8 hin commission hui at tyk la awm ve tih kum 50 ka cup thlang ai. Politic (ram

pai thaina) on bet pha u nawh thlaang ai tila awlpui la atyng sak. Meet lohlang veng Party syn tih thum ham koi tah airawl tung ep khui ka pha vaai nawh thlaang ai tila march 9 hin ah a tyng sak. Te kah a lawng im song nawh saina dawng Yangon University on college sengcamothli lawng march 15 hin ah caraam thut arek raa u. Delhi ka awm raicathli lawng khaw seh march 17 on 19 hin ah khawpaw tih paang u. bran kah alawng im sai on tyng sakna dawng NLD raawi huithli march 29 hin ah humtunna a sai u. Te kah humtunna hyn ah Daw Su Kyi lawng cathut akaa tih teena akhyh u. Thui ngawngna akhyh u cong u ca khat lawng khaw seh olh myh la thlangping kawvai on kum 2010 meet loh langna ah thum nawh ham awl a tlok u. 1990 kum MP ka dang Party kut zying laipai khat sut on hainaw ka mawk ceem khatsut laipathli lawng march 29 hin NLD rawi huui kah awltlokna tah ka kaw vai pui u tila awmngaih ciil athui u.

MATU PARTY

Matu ram tengvai ah ka awm khumi on meram lawng ngawlhbyl party a syn tih, meet aloh lang u. MP to a dangtih, phyn ham baan a lam. Matu lawng pekbounda on phengpheeng rek tih koom u kang, zingreelna hyncak ka khyh nawh, thingbai hawnvut khui kah thingtuk vaca buu tuk on lo u. Tungrilh kavyt khawimu lawng thlipui rawnu a thooi veng, thin hoopna khyh nawh. Maturam na mik naawi lang tah tengvai dan lah, tu na huh tih khaw napok. Buh beel saw kah melung la khawsoih bawi lawng nang n'mawp. "thlangzook awl theen tih, thlangrun huh tuui" Huutung lah matu ram dolh ham kaipui kaa lawng aa tih, dykna minkeeng ah na pai te na ming aw? Hoi u lah, hula manglang vamel loih. Ram ham pokthenna hailam khaw rokbah pon sih.

Kum 2008 mawtna lawng im saina tah, tlaang thlaangthli ham hai khangna awm nawh. Kum 2010 meet tykna a lawng im saina a song nawh dawng ram tlo tlo lawng kawl Bran a dook. Kum 1990 meet loh lang veng MP ka dang party kha sut lawng, kum 2010 meet loh lang veng ka thum ma nawh ti u. tyng tangkiik, te ca khaw te kawng dawng vai vawn bol lang hop u de.

Nam tlo uk hui awm ana ngaih nawh dawng matu Paham Tlunglai on hui at lawng Japan ceem a tlok. Democracy dang tih, federel a lawng im on ram cuut tih khawl cuui ham Chin Pahamthli falam ah tuunpui a sai tih, matu kut zying laipai ah Paham Shungning lawng thum. Pahamthli kah tat vutna rang on zalpawna huh la awm. Tetih la Maturam ah Paham Shungning lawng Parliament a bi. Pahamthli lawng Democracy kirang ngaltang a kah tih, a caak awk tangte pon. Tedawng matu ngawlhbyl party syn tih, kah tangte Democracy kirang lu lawh on tai kopna a lan taang n'pha pon. Meet tykna a lawng im theen on theen

nawh byh khing bol lang, Bran lawng kamthlahna pal he tlah ma nawh. Party syn tih pai he awl pui la awm pon. Politics khawpawna thli thlopholh na thai ham tah, akhui ah kuun tih, Plotic (rampai thaina) a lawng im on thlop holh tih lymhang pui a ngo. Tengvai khawree byh ouh la cehlawng haiben dan on tlyk tlyk ceh ham awm. Te dengah lansak kawltung n'pha thai vetih, ram lawng haikhangna a dang ai.

CHO PARTY

Hyyn ceek khui thlaang zohca lawng politic (ram paithaina) party syyn tih pai lak ah hyn kau khui ah politic party syn tih MP zahawh pai thaina he tah athaa raa ngaai. Kum 2008 mawtna alawng im thlakrool 104...7/ athaan 16 na, hyncek khui kah thlangmi zohca awmna hyn tah (Self Administrated Areas) khawri ukna, ahyyn kau tih thlangping zahawh awmna hyn tetah (Self Administrated Division) nawh tah (Self Administrated Zone), khawrii ukna la awm ai tila atyng sak. Tetih angla Paletwah, Matupi, Kanpetlet, Setuktaya makoui ram on Minpya yakheng ram boih cingcuui tih Cho party khat la pai thai kawi nih (Division) to pai thai la awm ai. Teah tah ngongaihna huh ham koithli zoi vetih dangthai la awm ai tila huhna on zakmingna ka tyng sak.

Kawthe Puina

Salai Palenthang he Pa Bawngkung on Nu Nutym lawng kum 1956 May 5 hin ah, Matu Peng, Kola khawah acuntih lumhacyk caming tawngpa la awm. Kum 1990 kawlam party meet tyk veng NLD partyah tummu thlaangla awm. Salai Palenthang he hy he atuuk tih airawl khui atung ep. Teveng NLD rawihui hyy ralkap lawng tuuk ham la a thloom. Tedawng kum 2003 ah India ram tungla heng tih Delhi khawpui UNHCR ah kun. Kum 2004-2007 toe la MCF bawkna ah a ham ca a va bi van. 2008 April ni 3 hin atah Delhi ka lawng Australia ram la atat. A lungnabik a zu Khin Ye oen a ca tawngpa (3) te kum 2010 February 17 hin ah hlanmawl la a khum tak.

Bol raikung

Thalam Salai Sawngpai

Email- thalamtlang.por@mail.com